

欽定續通志



欽定續通志卷四百四十七

列傳

元一

穆呼哩

博爾濟納爾

塔斯巴圖爾

蘇肯微爾

托克托

博爾濟

伊實特

穆爾

博勒呼

塔齊

爾

齊

穆呼哩扎拉爾氏世居鄂諾水東父喀根果幹以戚里故在太祖麾下從平默爾奇斯征奈曼部數立功後奈曼又叛太祖與六騎走中道乏食擒水際察馳殺之燔以啖太祖追騎垂及而太祖馬蹶五騎相顧騷愕喀根果幹以所乘馬濟太祖身當追騎死之太祖獲免有子五人穆呼哩其第三子也沉毅多智略猿臂善射與博爾濟博羅罕濟拉衮事太祖俱以忠勇稱號都爾本庫魯克猶華言四傑也一日太祖從三十餘騎行谿谷間顧謂曰此中或遇寇當奈何對曰請以身當之既而寇果自林間突出矢下如雨穆呼哩引弓射之三發中三人其會呼曰爾爲誰曰穆呼哩也寇遂引去克降王汗與奈曼部警戰求援於太祖太祖遣穆呼哩及博爾濟等救之盡殺奈曼之衆于阿勒台之下既而王汗謀襲太祖其下巴爾台知之密告太祖太祖遣穆呼哩選精騎夜斫其營王汗走死諸部聞風款附歲丙寅太祖卽皇帝位首命穆呼哩博爾濟爲左右萬戶辛未從伐金薄宣德遂克德興壬申攻雲中九原諸郡拔之進圍撫州金兵號四十萬陣野狐嶺北穆呼哩曰彼衆我寡弗致死力戰未易破也率敢死士策馬橫戈大呼陷陣帝麾諸軍並進大敗金兵癸酉攻居庸關壁堅不得入遣別將哲伯統兵趨紫荆口金兵潰遂拔涿州因分兵攻下益都濱棣諸城遂次霸州史天倪蕭伯特率衆來降並奏爲萬戶甲戌從圍燕金主請和北還命統諸軍征遼東次高州盧琮金朴以城降乙亥

按攻降北京續通鑑作甲戌年九月事與本傳異

裨將蕭額森以計平定

東京進攻北京金守將伊木沁率衆二十萬逆戰敗之斬首八萬餘級城中食盡其下殺伊木沁遂舉城降以烏
頁爾權兵馬都元帥鎮之遣高德玉劉布斯格爾招諭興中府同知烏里布不從殺布斯格爾德玉走免未幾吏
民殺烏里布舉城降錦州張鯨聚衆十餘萬殺節度使稱臨海郡王至是來降詔穆呼哩以鯨總北京十提控兵
從多果朗南征未附州郡穆呼哩密察鯨有反側意請以蕭額森監其軍至平州鯨謀遁去蕭額森執送行在誅
之

按平定東京及監張鯨軍事詳見舒穆魯
蕭額森傳此作蕭額森從其舊姓也

鯨弟致憤其兄被誅據錦州叛略平變瑞利義懿廣寧等州穆呼哩率

蒙古布哈等軍討之州郡多降進逼紅羅山主將杜秀降丙子致陷興中府進兵臨興中先遣烏頁爾等攻溜石
山又遣蒙古布哈屯永德縣東候之致遣鯨子東平將兵援溜石蒙古布哈引兵趨之馳報穆呼哩夜半引兵疾
馳遇於神水縣東夾擊之斬東平及士卒萬餘級拔開義縣進圍錦州致遣張太平高益出戰又敗之圍守月餘
高益縛致出降伏誅廣寧劉炎懿州田和尚降穆呼哩曰此叛寇存之無以懲後除工匠優伶外悉屠之拔蘇復
海三州斬完顏重嘉努咸平宣撫富森等率衆十餘萬遁入海島丁丑詔封太師國王都行省承制行事賜誓券
曰子孫傳國世世不絕分鴻吉哩伊奇喇斯烏嚕古莽果等十軍及烏頁爾契丹蕃漢等軍並屬麾下乃建行省
於雲燕以圖中原遂自燕南攻遂城及懿州諸城拔之冬破大名府遂東定益都淄登萊濰密等州戊寅攻太原
忻代澤潞汾霍等州悉降之遂徇平陽金守臣棄城遁以前鋒托卜安札爾統蒙古軍鎮之己卯以蕭特穆爾等
出雲朔攻降岢嵐火山軍以詰里濟達爲元帥達嚕噶齊攻拔吉陽州擊絳州克之庚辰復由燕徇趙至滿城武
仙舉真定來降權知河北西路兵馬事史天倪進言曰中原粗定所過猶縱兵抄掠非王者弔民意也穆呼哩曰
善下令禁無剽掠軍中肅然吏民大悅兵至潞陽金邢州節度使武貴迎降進攻天平寨破之遣蒙古布哈分兵

略定河北衛懷孟州入濟南嚴實籍所隸各州戶三十萬詣軍門降時金兵屯葦陵岡號二十萬遣步兵二萬襲濟南穆呼哩以輕兵五百擊走之遂會大軍薄黃陵岡大敗之進攻楚邱拔之攻下單州圍東平以寶權山東西路行省戒之曰東平糧盡必棄城走汝伺其去卽入城安輯之勿苦郡縣留蘇瞻克圖以蒙古軍三千屯守之辛巳東平糧盡金行省孟占奔汴蘇瞻克圖邀擊之斬七千餘級孟古引數百騎遁去實入城撫其民先是郡王忒遜攻洛不下至是遣石天應拔之還軍野狐嶺宋澮水忠義統轄石珪京東安撫使張琳皆來降鄭遵亦以棗鄉舊縣降復由雲中歷太和寨入葦州金將王公佐遁以石天應權行臺兵馬都元帥進取綏德破馬蹄寨距延安三十里止舍金行省完顏哈達出兵三萬陣於城東蒙古布哈請以伏兵取勝從之夜半大軍銜枚齊進伏於城東兩谷間明日蒙古布哈進兵望見金兵卽棄鼓旗走金兵追之伏發鼓聲震天地萬矢齊下金兵大敗哈達走保延安圍之旬日不下乃南徇洛川克鄜州北京權帥石天應擒送金驍將張鐵槍穆呼哩欲解其縛諸將怒其不屈竟殺之遂降坊州大饗士卒聞金復取隰州以希禪爲經略使於是復由丹州渡河圍隰克之留和卓統蒙古軍鎮吉陽間以田雄權元帥府事壬午秋令蒙古布哈引兵出秦隴以張聲勢大兵道雲中攻下孟州四歸寨遷其民於州拔晉陽義和寨進克三清巖入霍邑山堡遷其人於趙城縣薄青龍堡金平陽公胡天祚拒守裨將富察鼎珠監軍王和

按金史胡天祚傳云知府事珠格和色哩總領提控王和人名官名均異本傳

開壁降遷天祚於平陽冬十月過晉至絳拔榮州胡

瓶堡所至望風歸附河中久爲金有至是復來歸穆呼哩召石天應謂曰蒲爲河東要害我擇守者非君不可乃以天應權河東南北路陝右關西行臺平陽李守忠太原攸哈喇巴圖隰州田雄並受節制命天應造浮梁以濟歸師乃渡河拔同州下蒲城徑趨長安金京兆行省完顏哈達擁兵二十萬固守不下乃分麾下烏爾古納台哈

布哈兵六千屯守之遣阿齊將兵三千斷潼關遂西擊鳳翔月餘不下謂諸將曰吾奉命專征不數年取遼西遼東山東河北不勞餘力前攻東平延安今攻鳳翔皆不下豈吾命將盡耶乃駐兵渭水南遣蒙古布哈南越牛嶺

關徇宋鳳州而還時金將侯小叔

按續通鑑云金元帥都監侯小叔取河中殺蒙古石天應元史於本傳作中條山賊侯七於安札爾傳則稱金侯將軍今並依續通鑑改正

聚衆十

餘萬伺大兵旣西謀襲河中石天應戰死城陷賊燒燬廬舍殺掠人民還走中條先鋒元帥鄂齊爾邀擊敗之斬

數萬級侯小叔復遁去穆呼哩以天應子烏格襲領其衆癸未春師還浮梁未成顧諸將曰橋未畢工安可坐待

乎復攻下河西堡寨十餘渡河還聞喜縣疾篤召其弟岱遜曰我爲國家助成大業無復遺恨第恨汴京未下耳

汝其勉之卒至治元年詔封崆峒果幹魯國王諡忠宣穆呼哩魯國王諡忠武子博囉嗣

博囉沈毅魁傑寬厚愛人通諸國語善騎射年二十七入朝行在所時太祖在西域夏國主李王陰結外援蓄異

圖密詔博囉討之甲中秋攻銀州克之斬首數萬俘監府塔爾海命都元帥蒙古布哈將兵守其要害而還乙酉

春復朝行在所同知眞定府事武仙叛殺都元帥史天倪脅居民遁於雙門寨仙弟質於軍中挈家逃歸遣賽罕

追及於紫金關斬之命天倪弟天澤代領帥府事丙戌夏詔封功臣戶口爲食邑曰十投下博囉居其首宋將李

全陷益都執元帥張琳送楚州博囉引兵入齊先遣李喜孫招諭全全欲降部將田世榮等不從殺喜孫丁亥春

全突圍欲走邀擊敗之四月城中食盡全降

按李全之降太祖紀作丙戌十二月續綱目作丁亥五月此云丁亥四月紀年互異詔博囉便宜處之乃以全

爲山東淮南楚州行省鄭衍德田世榮副之郡縣聞風款附山東悉平時滕州尙爲金守諸將或言炎暑未可進

攻博囉不聽促進兵金兵出戰敗之老幼開門出降以州屬石天祿俾先鋒元帥蕭鼎爾台統蒙古軍屯濟兗庫

庫布哈以兵三千屯濰沂莒以備宋千戶阿里統大軍駐河北備金九月師還至燕聞太祖崩趨赴北庭哀毀邁

疾戊子夏卒至治元年詔封魯國王諡忠定子七人長塔斯次蘇肯徹爾次巴圖爾

按元明善撰東平忠憲王碑以巴圖爾爲塔斯第二子與

此互次拜納次額默根次額布根次阿爾濟遜

塔斯一名扎拉古年十八襲爵遂至雲中庚寅秋叛將武仙圍潞州太宗命塔斯救之仙聞之退軍十餘里金將伊喇布哈來襲我師與戰不利退守沁南賊還攻潞州城陷主將任存死之冬十月帝親征遣萬戶楊珠濟達與塔斯復取潞州仙夜遁邀擊之斬首七千餘級以任存姪代領其衆帝攻鳳翔命塔斯守潼關以備金兵河中自石天應死復爲金有辛卯帝親攻拔之金元帥完顏和拉遁塔斯追斬之壬辰春睿宗與金兵相拒於汝漢間帝命塔斯與親王阿齊台昆布哈合軍先進以爲聲援至三峯山塔斯冒矢石先挫其鋒諸軍繼進大敗金兵擒伊喇布哈完顏哈達單騎走鈞州追斬之遂拔鈞州三月帝北還詔塔斯與呼圖克統兵略定河南諸郡皆降惟汴京歸德蔡州未下塔斯請分攻汴京帝命卜之不利乃止癸巳秋從定宗於潛邸東征擒金咸平宣撫完顏萬努於遼東甲午秋朝行在所時諸王大會帝顧塔斯曰先皇帝肇開大業垂四十年諸國皆已臣附惟東南一隅尙阻聲教朕欲躬行天討卿等以爲何如羣臣未對塔斯曰臣家累世受恩願仗天威掃清淮浙何勞大駕親臨不測之地哉帝悅命與皇子廬春總軍南征乙未冬拔棗陽廬春別徇襄鄧塔斯引兵攻郢鄧壁堅不能下俘生口數萬而還丙申冬復出鄧州遂至鄆黃蘄州遣使犒師乃捨之遂進拔符鎮六安縣雋家寨丁酉秋由八柳渡河入汴京守臣劉甫置酒大慶殿塔斯曰此故金主所居我人臣不可處此遂宴於甫家復與昆布哈攻光州主將黃舜卿降昆布哈別略黃州塔斯攻大蘇山斬首數千級戊戌春至安慶府官民皆遁至北峽關宋汪統制率兵三千降遷之尉氏己亥春卒子蘇都爾幼弟蘇肯徹爾襲蘇都爾既長詔別賜民三千戶爲食邑得建國王旗幟

置官屬如列侯故事蘇都爾卒子呼圖克華襲呼圖克華卒子呼圖克特穆爾襲呼圖克特穆爾卒子寶格襲寶格卒子道通襲

蘇肯徹爾性嚴厲賞罰明僧人莫敢犯與兄塔斯從太宗攻鳳翔有功將兵抵潼關與金人戰屢捷既滅金皇子庫春攻宋棗陽入郢蘇肯徹爾皆與焉歲己亥蘇肯徹爾襲爵上京之西阿爾察圖置營總中都行省蒙古漢軍凡他行省監鎮事必先白之而後上聞帝嘗遣使至見其威容凜然紀綱整肅還朝以告帝曰真穆呼哩家兒也他國可有至者每見皆倉皇失次左右或諫曰諸王百司既莫敢越而復示之以威使人怖畏蓋少加寬恕以待之蘇肯徹爾曰爾言誠是然時有不同寬猛各有所宜施天下初附民心未安萬一守者自縱事變忽起悔之何及尋卒延祐三年追封東平郡王諡忠宣子四人長和爾齊襲王爵曰納顏曰姜衛曰薩滿姜衛自有傳

納顏性謙和好學以賢能稱蘇肯徹爾既薨憲宗擇於諸子命納顏襲爵納顏力辭曰臣有兄和爾齊當襲帝曰朕知之然柔弱不能勝和爾齊亦固讓納顏力辭不得命乃曰王爵必不敢受願代兄行軍國之事於是和爾齊襲爲國王事無巨細必與納顏謀議剖決精當無所壅滯世祖在潛藩常與論事謂左右曰納顏後必可大用因號之曰色辰猶華言大賢也納顏雖居貴要而小心謹畏每誨羣從子弟勿驕惰以墮先業及病卒世祖爲之悲悼至正八年贈中奉大夫遼陽等處行中書省參知政事護軍追封魯郡公子二人曰碩德曰巴延徹爾碩德通敏有幹才世祖卽位入宿衛典朝兵後同知通政院事嘗言遼東溫綽濟喇敏二種民數爲寇宜遣近臣諭之帝方難其人僉曰惟碩德元勳世胄可使帝然之以問碩德碩德請行至則集諸萬戶陳兵衝要請其渠魁誅之脅從者皆降帝大悅賞賚有差後從征納顏及使西域屢建殊勳卒諡忠敏追封魯郡公

巴圖爾從世祖征伐爲先鋒元帥累立戰功世祖在潛邸從容語巴圖爾曰今天下稍定我欲勸主上駐蹕回鶻以休兵惠民何如對曰幽燕之地龍蟠虎踞形勢雄偉大王果欲經營天下駐蹕之所非燕不可世祖慨然曰非卿言我幾失之己未秋命巴圖爾率諸軍由蔡南伐宋且移檄諭宋沿邊諸將遂與世祖兵合而南五戰皆捷遂渡大江傳于朝會憲宗崩于蜀額呼布格構亂和林世祖北還留巴圖爾總軍務以待命世祖至開平卽位還定都于燕嘗曰朕居此以臨天下巴圖爾之力也師還中統二年卒于軍大德八年追贈東平王諡武靖夫人特穆爾昭睿順聖皇后同母姊也子四人長安圖次定通次巴爾和坦他姬子曰和通襲國王安圖別有傳

托克托父薩滿幼穎異自襁褓時世祖撫之若子及長常侍左右帝有意大任之會以疾卒不果年僅一十有七托克托幼旣失怙其母博囉罕篤意教之稍長直宿衛世祖復親誨導旣冠喜與儒士語每聞一善言善行終身不忘至元二十四年從征納顏帝駐蹕於山巔托克托擐甲率家奴數十人疾馳擊之衆皆披靡帝望見嗟賞顧

謂近臣曰薩滿可謂有子矣由是深加器重得預聞機密之事其後哈坦復爲亂成宗時在潛邸督師往征之托

克托引衆率先躍馬感之其衆大潰托克托馬陷于泥淖中哈坦兵復挑戰托克托弟阿喇卜丹奮戈衝擊遂大敗之成宗卽位寵顧尤篤常侍禁闥出入惟謹拜上都留守政令嚴肅克修其職大德三年

原文脫大德二字今據紀增

擢江

浙等處行中書省平章政事時朱清張瑄以海運之故致位參知政事恃其勢位多行不法恐事覺以金珠賂托克托求蔽其罪托克托大怒繫之有司遣使者以聞帝喜益寵賚之有豪民白晝殺人托克托立命有司按法誅之自是豪猾屏息民賴以安十一年卒于位子多爾濟別有傳

博爾濟阿爾拉氏始祖勃端察爾以才武雄朔方父諾海阿爾斯蘭與烈祖神元皇帝接壤敦睦隣好博爾濟善

戰知兵事太祖於潛邸征伐四出無往不從時諸部未寧博爾濟每警夜寓直於內語及政要或至達旦初伊勒錦部卒盜牧馬博爾濟追之時年十三知衆寡不敵乃出奇從旁夾擊之盜舍所掠去及戰于和濟格爾兩軍相接下令殊死戰跬步勿退博爾濟繫馬于腰蹠而引滿分寸不離故處太祖嘉其勇膽又嘗潰圍於奇味太祖失馬博爾濟擁帝累騎而馳頓止中野會天雨雪與穆呼哩張氈裘以蔽帝足蹟不移及旦雪深數尺遂免於難默爾奇斯之戰風雪迷陣再入敵中求太祖不見急趨輜重則帝已還臥憩車中聞博爾濟至曰此天贊我也丙寅歲太祖卽位遂以博爾濟及穆呼哩爲左右萬戶各以其屬翊衛位在諸將上皇子察罕台出鎮西域有旨從博爾濟受教博爾濟教以人生經涉險阻必獲善地所過無輕舍止太祖謂皇子曰朕之教汝亦不踰是未幾賜廣平路萬七千餘戶爲分地以老病卒大德五年追封廣平王諡武忠子博羅台襲爵萬戶追封廣平王諡忠定孫伊實特穆爾

伊實特穆爾世祖時嘗寵以不名賜號伊嚕勒諾延弱冠襲爵統阿勒台部衆世祖聞其賢驛召赴闕時重太官內膳之選特命領其事至元十二年拜御史大夫江南既定益封功臣後遂賜全州清湘縣戶爲分地其在中臺務振宏綱弗親細故興利之臣欲緩金舊制併憲司入漕府當政者又請以郡府之吏互照憲司檢底伊實特穆爾曰風憲所以戢奸若有傷監臨之體其議乃沮遇事廷辯吐辭鯁直世祖每爲之震威二十四年世祖征納顏至平道伊實特穆爾已退敵數旬之間三戰三捷獲納顏以獻世祖還留伊實特穆爾剿其餘黨乃執酋金嘉努以獻戮其同惡數人於軍前明年納顏之遺孽哈坦多羅干復叛再命出師兩與之遇皆敗之乃過黑龍江掃其巢穴殺戮殆盡哈坦多羅干莫知所終夷其城撫其民而還詔加太傅開府儀同三司申命禦邊航海二十九

年加錄軍國重事知樞密院事宗王帥臣咸稟命焉三十年成宗以皇孫撫軍北邊伊寶特穆爾輔行請授皇孫以儲闡舊璽詔從之三十一年世祖崩皇孫南遷宗室諸王子會于上都定策之際伊寶特穆爾起爲晉王噶瑪拉曰宮車晏駕已踰三月神器不可久虛曠昔儲闡符璽既有所歸王爲宗盟之長奚俟而不言噶瑪拉遽曰皇孫踐阼願北面而事之於是宗親大臣合辭勸進伊寶特穆爾復位曰大事已定吾死且無憾皇孫卽位進秩太師還鎮北邊元貞元年冬議邊事入朝兩宮賜宴如家人禮以疾卒大德五年追封廣平王諡貞憲子三人穆哩庫仍襲爵爲萬戶次托里次托克托呼爲御史大夫

博勒呼學順氏從太祖起朔方直宿衛爲和爾齊和爾齊者佩藥韃侍左右者也太祖平諸國宣力爲多與穆呼哩等以功稱四傑身百餘戰竟歿於敵是時官制簡古止爲第一千戶後封於淇州又食沅州贈太師追封淇陽

王按忠武王伊徹察喇碑文云太祖佐命元勳曰穆呼哩曰博爾齊博勒呼朝廷謹功選德必首三家元史叙三家於諸臣之首而本傳最略其事散見于從孫塔齊爾傳中今採輯補正子托歡襲職從憲

宗四征不庭有括地功子寶勒們鎮徼外從征六詔等城亦歿于兵子伊徹察喇性仁厚勤儉事母以孝聞世祖

雅聞其賢且閔其父之死年十六召見喜曰寶勒們有子矣卽命領四集賽太官至元十七年長一集賽明年詔

爲宣徽使二十六年帝討海都原文作叛者今據續通鑑改于杭愛衆皆陣伊徹察喇請與安圖巴延伊魯勒戰不許二十七

年僧格旣立尙書省殺異己者箝天下口以刑爵爲貨紀綱大紊尙書平章政事伊蘇岱爾太官屬也潛以其事

白伊徹察喇請奏劾之僧格伏誅按續通鑑至元二十八年學士趙孟頫奉御徹爾奏僧格由是伏罪紀年紀事均異本傳帝擇湖廣行省西

連番洞諸蠻南接交趾島夷延袤數千里其間土沃人稠畝丁溪子善驚好鬪思得賢方伯往撫安之伊徹察喇

舉哈喇哈斯達爾罕以爲行省平章政事凡八年威德交孚治于海外入爲丞相天下稱賢世以伊徹察喇爲知

人二十八年都水使者請鑿渠西導曰浮諸水經都城中東入潞河帝亟欲其成敕四集賽人及諸府人專其役刻日使畢工伊徹察喇率其屬著役者服操畚鍤趨者雲集依刻而渠成賜名曰通惠河公私便之成宗卽位加開府儀同三司太保錄軍國重事樞密宣徽使大德四年拜太師初金山南北叛王海都都勒幹據之不奉正朔垂五十年時入爲寇嘗命親王統左右部宗王諸帥屯列大軍備其衝突五年朝議北師少怠紀律不嚴命伊徹察喇副晉王以督之是年海都都勒幹入寇大軍分爲五隊伊徹察喇將其一鋒旣交伊徹察喇身先陷陣一軍隨之出敵之背五軍合擊大敗之海都都勒幹遁去

按續通鑑云海都與都勒幹諸部大舉入寇哈倫督五軍合擊破之阿實克射都勒幹中膝號哭遁去與此互異厥

後都勒幹請臣附時武宗亦在軍伊徹察喇遣使詣武宗及諸王將帥議曰都勒幹請降爲我大利因當待命於上然往返再閱月必失事機宜遣使許其臣附衆議皆以爲允旣遣使以事聞帝曰伊徹察喇深識機宜旣而瑪古哈喇復命由是叛人稍稍來歸十年冬叛王穆爾特穆爾等屯于金山武宗帥師潛踰金山伊徹察喇以諸軍繼往穆爾特穆爾乃降徹伯爾者海都長子也海都死嗣領其衆至是捨取其部人凡兩部十餘萬口至大元年伊徹察喇遣使奏曰諸王托和木本懷攜貳而徹伯爾游兵近境叛黨素無悛心倘合謀致死則爲國患臣以爲昔都勒幹先衆請和雖死宜遣使安撫其子庫春使不我異又諸部降人宜處之金山之陽吾軍屯田金山之北軍食旣饒又成重成就彼有謀吾已擣其腹心矣奏入帝曰是謀甚善卿宜移軍阿達哈賽音薩哈地伊徹察喇旣移軍徹伯爾托和木果欲奔庫春不見納遂相率來降於是北邊始寧詔爲和琳等處行中書省右丞相依前太師錄軍國重事特封淇陽王四年入朝帝宴于大明殿眷禮優渥尋以疾薨于第諡忠武

塔齊爾一名布展居官山博勒呼從孫也驍勇善戰幼直宿衛太祖平燕睿宗監國聞燕京盜賊恣意殘殺乃遣

塔齊爾耶律楚材竊治其黨盜屏迹太宗伐金塔齊爾從師授行省兵馬都元帥分宿衛與諸王軍士傳統之下
河東諸州郡濟河破潼關取陝洛辛卯從圍河中府拔之壬辰從渡白坡時睿宗已自西和州入興元由武關出
唐鄧太宗遣使約期會兵合進與金人戰于三峯山大破之詔塔齊爾等進圍汴城金主以兄子曹王額爾克爲
質太宗與睿宗還河北塔齊爾復與金兵戰于南薰門癸巳金主遷蔡州塔齊爾復帥師圍蔡甲午滅金遂留鎮
撫中原分兵屯大河之上以遏宋兵丙申破宋光息諸州詔以息州軍民一千戶賜之戊戌卒子必里克台襲父
職總管四萬戶蒙古漢軍攻宋兩淮悉定邊地戊午會師圍宋襄陽逼樊城力戰死之次曰都木達至元七年襲
蒙古軍萬戶八年再攻襄陽圍樊城進戰鄂岳漢陽江陵歸峽諸州皆有功十二年受詔爲隆興出征都元帥盡
平江西十一城又徇嶺南廣東宋亡還師卒

欽定續通志卷四百四十七終

欽定續通志卷四百四十八

列傳

元二

察罕

伊塔薩哈勒
喇勒智喇幹

徹伯爾和卓

卓沁台

實訥台

瑪古岱爾
烏爾圖

烏頁爾

蘇布特

烏蘭
哈達

阿勒楚爾

鄂約達勒

察罕初名伊德唐古鄂摩克氏父吹辰類爲夏臣其妾方懷察罕不容於嫡母以配掌羊羣者及察罕稍長嫡母已有弟矣察罕武勇過人幼牧羊於野太祖出獵與語異之乃挈以歸語光獻皇后曰今日出獵得佳兒可善視之命給事內廷及長賜姓蒙古妻以宮人鴻吉哩氏從帝略雲中桑乾金將達實擁重兵守野狐嶺帝遣察罕覘虛實還言彼馬足輕動不足畏也帝命鼓行而前遂破其軍圍白樓七日拔之以功爲御帳前首千戶從帝征西域布哈爾賽瑪爾堪二城回回國主札拉鼎拒守鐵門關兵不得進察罕先驅開道斬其將餘衆悉降又從攻西夏破肅州師次甘州察罕父吹辰類居守城中察罕射書招之且求見其弟時弟年十三命登城高處見之且遣使諭城中使早降其副恩楚等三十六人合謀殺吹辰類父子并殺使者併力拒守城破帝欲盡坑之察罕言百姓無辜止罪三十六人進攻靈州夏人以千萬衆赴援帝親與戰大敗之遣次六盤夏主堅守中興帝遣察罕入城諭以禍福衆方議降會帝崩諸將擒夏主殺之復議屠中興察罕力止之馳入安集遣民太宗卽位從略河南皇子庫春胡土克圖伐宋命察罕爲斥候又從親王昆布哈南伐歲乙未

按庫春克襄陽通鑑作丙申歲八月事克襄陽及光化軍

按本紀乙巳歲皇后稱制命馬步軍元帥察罕等攻拔壽泗諸州此云戊戌則

當在太宗之十年矣疑誤

授馬步軍都元帥率諸翼軍攻拔天長縣及滁壽泗等州定宗時命拓江淮地憲宗卽位以都元帥

兼領尙書省事賜汴梁歸德河南懷孟曹濮太原三千餘戶爲食邑及諸處草地合一萬四千五百餘頃戶二萬餘乙卯卒追封河南王諡武宣子十人長穆呼哩事憲宗直宿衛從攻釣魚山以功授四鄂爾多齊哩克昆千戶至元四年攻宋自江陵略地回至安陽灘宋兵扼其歸路穆呼哩奮擊敗之都元帥阿珠墜馬宋軍追及之穆呼哩挾之上馬盛戰退宋兵爲蒙古軍萬戶復攻襄樊有功卒于軍追封梁國公諡武毅從孫伊埒薩哈勒

伊埒薩哈勒祖吹且佐太祖時得召見屬皇子察罕台爲扎爾古齊父阿卜呼事諸王阿勒呼本居西城至元十年擇貴族子備宿衛名伊埒薩哈勒至闕下以爲舒庫爾齊掌服御事甚見親幸有大政時以訪之稱之曰秀才嘗奏使河西還奏諸王哲伯特穆爾用官太濫帝嘉之擢河東提刑按察使遷平陽路達嚕噶齊台哈布哈進南臺中丞時丞相阿哈瑪特之子呼遜爲江淮行省平章政事恃勢貪穢伊埒薩哈勒發其姦奏誅之并劾江淮釋教總攝嘉木揚喇勒智諸不法事諸道竦動二十一年改北京宣慰使諸王納顏鎮遼東伊埒薩哈勒察其有異志密請備之二十三年罷宣慰司立遼陽行省以伊埒薩哈勒爲參知政事已而納顏果反帝自將征之時諸軍皆會伊埒薩哈勒掌運糧儲軍供無乏東方平帝嘉其先見且餉運有勞加左丞二十七年命尙諸王算濟女改四川行省左丞元貞元年入朝卒喇勒智喇幹

喇勒智喇幹爲裕宗東宮筆且齊典文書至元十八年蜀初定帝閱其地久受兵擇近臣撫安之以喇勒智喇幹爲嘉定路達嚕噶齊時方以闕田均賦弭盜息訟諸事課守令喇勒智喇幹奉詔甚謹民安之會盜起雲南聲言欲寇成都喇勒智喇幹馳入告急帝曰南人生長亂離豈不厭兵畏禍其歸以朕意告諸將叛則討之服則捨之

毋多殺以傷生意則人心定矣喇勒智喇幹至蜀宣布上旨俄召爲泉府卿後遷刑部尙書有小吏誣告漕臣劉獻盜倉粟丞相僧格方事聚斂衆阿其意鍛煉枉服喇勒智喇幹曰刑部天下持平今鞏轂之下漕臣以冤死何以正四方乎卽以實聞以是忤丞相出爲江東道宣慰使在官務興學諸生有俊秀者拔而用之爲政嚴明豪民猾吏不敢犯元貞二年遷四川行省參知政事大德三年以參知政事爲湖南宣慰使繼改荆湖荆湖多弊政而公田爲甚部內實無田隨民所輸租取之戶無大小皆出公田租雖水旱不免喇勒智喇幹問民所不便凡十數事上於朝而言公田尤切朝議遣使理之民力少蘇七年再遷四川行省參知政事八年進左丞雲南王入朝所

在以驛騎縱獵喇勒智喇幹曰驛騎非有急不得馳況獵乎王憚爲之止獵蜀人饑親勸分以賑之有死無葬者則以已錢買地使葬且修寬政以撫其民部內以治十年遷湖廣行省左丞湖廣歲織幣上供以省臣領工作遣使買絲他郡多爲姦利工官又爲刻剝故匠戶日貧造幣益惡喇勒智喇幹令工視賈人藏絲者擇買之工不告病至大三年以疾卒於官諡忠惠子二人長瑪南翰林學士承旨次吉納御史大夫孫達爾瑪內府掌櫃

徹伯爾和卓賽音人賽音西域部之族長也因以爲氏和卓其官稱也太祖與克呀王汗有隙一夕王汗潛兵來衆軍潰太祖遽引去從行者僅十九人徹伯爾與焉至班珠爾河糧盡無所得食會一野馬北來諸王哈扎爾射之殪遂煮而啖之太祖舉手仰天而誓曰使我克定大業當與諸人同甘苦苟渝此言有如河水將士莫不感泣王汗旣滅西域諸部次第亦平乃遣徹伯爾使金金不爲禮而歸金人恃居庸之塞治鐵鉏關門布鐵蒺藜百餘里守以精銳徹伯爾還報太祖遂進師距關百里不能前召徹伯爾問計對曰從此而北黑樹林中有間道終夕可至太祖乃令爲前導日暮入谷黎明已在平地疾趨南口金人猶睡未知也比驚起已莫能支吾鋒鏑所及流

血被野關既破中都大震已而金人遷汴太祖覽中都山川形勢顧謂左右曰朕所以至此者徹伯爾之功爲多乘輿北歸留徹伯爾與諸將守中都揆天下都達噶齊徹伯爾每戰被重甲舞槊陷陣馳突如飛衆莫能當卒年一百一十八追封涼國公諡武定二子阿里哈密拉齊阿里哈密從徹伯爾出入行陣勇而善謀憲宗伐蜀嘗爲天下質子兵馬都元帥云

卓沁台鄂爾和達氏其先琳沁巴丹以材武雄諸部生子曰鄂爾和達曰莽果當開創之先協贊大業厥後太祖卽位命其子孫因其名爲氏朔方既定舉六十五人爲千夫長鄂爾和達之孫曰卓沁台其一也初奇味王汗之子星根有智勇諸部畏之奇雅喇哈喇克沁沙陀等帥衆來侵兵戰不利近臣馳告太祖曰羣下忠勇無踰卓沁台者宜急遣之拒敵從之卓沁台承命單騎陷陣射殺星根降其大將實勒們等遂併有奇味之地柰曼默爾格台合兵來侵卓沁台俘其主嘉克堅布及二女以歸諸部悉平與嘉克堅布盟而歸之未幾復叛卓沁台以計襲殺之遂平其國卓沁台始從征奇雅喇間關萬里每戰必爲先鋒帝賜嬪御茂巴哈必濟音濟薩巴傳統烏嚕古四千人世世無替子奇塔特材武過人自太宗及世祖歷事四朝以勞封德清郡王賜德州戶二萬爲食邑至元十八年增食邑二萬一千戶肇慶路連州德州洺屬邑俱隸焉奇塔特薨子都沁巴圖爾襲爵爲郡王太宗時與伊拉噶台戰勝帝卽以伊拉噶台妻賜之世祖之征額呼布格也奇塔特子哈達跪而前曰臣父祖在先朝屢立戰功今王師北征臣願力戰自効旣得請戰于實默溫都爾之地兵始交獲其將哈坦斬之威喇之軍遂敗衄又戰于實喇雅圖噶之地當帝前混戰至日晡勝之李壇叛帝遣哈必齊等討之哈達亦在行壇平與有功焉哈達子托歡亦嘗從諸王齊齊克圖討珠爾噶台獲之又嘗破錫里濟永和爾于伊蘇摩哩及征納顏托歡弟慶通亦